



«Քայլ առ քայլ» բարեգործական հիմնադրամ

«Նախադպրոցական հաստատության մանկավարժական աշխատողների
մասնագիտական կարողությունների և հմտությունների զարգացման» ծրագիր

ՀԵՏԱԶՈՏԱԿԱՆ ԱՇԽԱՏԱՆՔ

Թեմա՝ Նախադպրոցականի աշխատանքային դաստիարակության գործընթացի
կազմակերպումը, որն ուղղված է սանի մոտ աշխատելու պահանջմունքի և
աշխատասիրության ձևավորմանը:

Դաստիարակ՝ Էլիզա Ռաֆիկի Պողոսյան

Մանկապարտեզ՝ «Ոսկեհասկի մանկապարտեզ» ՀՈԱԿ

Գյումրի 2022

ԲՈՎԱՆԴԱԿՈՒԹՅՈՒՆ

Ներածություն.....3

Գլուխ 1 Աշխատանքային դաստիարակության էությունը նախադպրոցական տարիքում.....

....4

Գլուխ 2 նախադպրոցականի աշխատանքային դաստիարակության գործընթացի կազմակերպման խնդիրները.....6

Եզրակացություն.....11

Օգտագործված գրականության ցանկ.....12

ՆԵՐԱԾՈՒԹՅՈՒՆ

Դաստիարակության նպատակի հարցը հուզել է բոլոր ժամանակների մանկավարժներին, քանի որ նպատակն է որոշում և թելադրում մանկավարժական գործունեության բնույթն ու նպատակները: Դաստիարակության ժամանակակից տեսությունն առավելապես կարևորում է դաստիարակության գործընթացի նպատակադրումն ուղղված կոնկրետ վերջնադրույքի ստացմանը, որն իր մեջ ներառում է մարդկության հավաքական արժեքները և պետք է համապատասխանի հասարակության գերակա նպատակներին և ժամանակի պահանջներին:

Դաստիարակության համակարգն իրենից ներկայացնում է դաստիարակության տարբեր բաղադրիչների ամբողջություն, որտեղ աշխատանքային դաստիարակությունն ունի կարևոր և բացառիկ նշանակություն: Աշխատանքը, իբրև մարդկային կարևոր գործունեություն, ձևավորվում է նախադպրոցական տարիքում: Երեխան սիրում է աշխատել և փորձում է ինքնահաստատվել ինքնուրույն աշխատանքային գործունեության միջոցով: Նախադպրոցական տարիքում երեխայի աշխատանքային գործունեությանը բնորոշ են առանձնահատկություններ. աշխատանքը չի ստեղծում նյութական արժեքներ, աշխատանքի խաղային բնույթը, իրադրային և ոչ պարտադիր բնույթը, արդյունքի պայմանավորվածությունը մեծահասակների օգնությամբ, աշխատանքային գործունեության դրդապատճառների տարերային բնույթը և այլն:

Նախադպրոցականի աշխատանքային դաստիարակությունը հիմնականում ուղղված է սանի աշխատանքային գործունեության կազմակերպմանն ու իրականացմանը, որի ընթացքը բնութագրում է նախադպրոցականի աշխատանքային դաստիարակության բուն իմաստը: Աշխատանքային դաստիարակությունը նպաստում է նաև սանի մոտ անձնային կարևոր որակների դաստիարակմանը:

Աշխատանքի նպատակն է ուսումնասիրել նախադպրոցականի աշխատանքային դաստիարակության գործընթացի կազմակերպումը և հիմնավորել այդ գործընթացի դերը սանի մոտ աշխատանքի պահանջմունքի և աշխատասիրության ձևավորման գործում:

Առաջադրված է հետևյալ վարկածը. Եթե աշխատանքային կառուցողական գործունեությունը լինի նախադպրոցական տարիքի երեխայի զարգացման համար կարևոր միջոց, ապա այդ տարիքին բնորոշ երեխայի զարգացումը կլինի բնականոն և ներդաշնակ:

ԳԼՈՒԽ 1

ԱՇԽԱՏԱՆՔԱՅԻՆ ԴԱՍՏԻԱՐԱԿՈՒԹՅԱՆ ԷՈՒԹՅՈՒՆԸ ՆԱԽԱԴՊՐՈՑԱԿԱՆ ՏԱՐԻՔՈՒՄ

Հանրագիտարանում աշխատանքը սահմանվում է որպես մարդուն բնորոշ նպատակադրված գործունեություն՝ ուղղված սեփական կարիքների և պահանջմունքների բավարարմանը՝ առարկայական աշխարհի ստեղծագործական վերափոխման եղանակով: Աշխատանքը բնական պահանջմունք է, մարդկային գոյատևման ձև: Մ.Խորենացին նշում էր, որ աշխատասիրությունը մարդկային բարձր արժանիքներից է, նրա շնորհիվ է մարդը կատարելության հասնում: Աշխատանքը երջանկության և հաջողության աղբյուր է, չարիքը վերացնելու և մարդուն կատարելության առաջնորդելու միջոց: Աշխատասիրությունը հնարավոր է դարձնում առաքինությունների իրականացումը, և այսպիսով, ինքն էլ մի տեսակ առաքինություն է՝ որոշ իմաստով նույնիսկ ավելի բարձր, քան մյուս առաքինությունները: Կ.Դ. Ուշինսկին ասում է . « Միայն աշխատանքի ներքին կենարար ուժն է իբրև աղբյուր ծառայում մարդկային արժանապատվության, դրա հետ միասին նրա բարոյականության և երջանկության համար»>: Իսկ Ղ.Աղայանը գրում էր, որ աշխատասիրությունը բոլոր առաքինությունների մայրն է, ինչպես ծուլությունը ծնող է ամենայն մոլորության: Պատկերավոր են նաև Բաֆֆու խոսքերը. «Գանձ գտնողի աղքատի որդիքը սոված կմեռնեն, իսկ քրտինքով վաստակած հացը չի սպառվի»:

Աշխատանքը՝ իբրև մարդկային կարևորագույն գործունեություն, ձևավորվում է նախադպրոցական տարիքում: Երեխան սիրում է աշխատել և փորձում է ինքնահաստատվել ինքնուրույն աշխատանքային գործունեության միջոցով: Երեխայի աշխատանքը չի ստեղծում նյութական բարիքներ, հաճախ նույնիսկ չի տալիս արդյունք, բայց ունի լուրջ դաստիարակչական նշանակություն: Աշխատանքի միջոցով նա ավելի է մտերմանում մեծահասակների հետ, ճանաչում է սեփական հնարավորությունները, համագործակցում մեծահասակների հետ, սովորում պլանավորել և վերահսկել սեփական գործողությունները, ձեռք է բերում կյանքի հմտություններ:

Երեխայի աշխատանքը նման է խաղի: Նրան հետաքրքիր է ոչ թե աշխատանքի արդյունքը, այլ ընթացքը, որն իր բնույթով իրադրային է: Երեխայի աշխատանքը ուղղված է ինքնահաստատմանը և ինքնաիրացմանը: Նախադպրոցական տարիքում երեխայի աշխատանքային գործունեությանը բնորոշ են հետևյալ առանձնահատկությունները.

- աշխատանքը չի ստեղծում նյութական արժեքներ,
- աշխատանքի խաղային բնույթը,
- աշխատանքային հմտությունների ձևավորումը, որոնք խիստ մասնագիտակցված չեն և կրում են ընդհանուր բնույթ,
- աշխատանքի իրադրային և ոչ պարտադիր բնույթը,
- աշխատանքի արդյունքի պայմանավորվածությունը մեծահասակների օգնությամբ,
- աշխատանքային գործունեության դրդապատճառների տարերային բնույթը:

Երկար տարիներ նախադպրոցականի աշխատանքային դաստիարակության համակարգում գերակայող է եղել այն կարծիքը, թե երեխայի աշխատանքային դաստիարակության հիմքում ընկած է մեծահասակների աշխատանքի հետ ծանոթացնելու սկզբունքը: Երեխան սովորում է աշխատել և հասկանում է աշխատանքի գերագույն նշանակությունը մարդկային կյանքում՝ միայն ընդօրինակելով և փորձելով նմանվել մեծահասակներին, հետևաբար և շուտ մեծանալ: Այս ճանապարհով է գիտակցվում երեխայի կողմից նաև աշխատանքային գործունեության արդյունքի հասարակական արժեքը: Սակայն վերջին տարիների հետազոտությունները խոսում են այն մասին, որ նախադպրոցահասակ երեխան ընդունակ է ինքնուրույն աշխատանքային գործունեության, կարող է պլանավորել և առաջնորդվել գործունեության ընթացքում սեփական դրդապատճառներով և նույնիսկ վերահսկել գործունեության ընթացքն ու արդյունքը: Աշխատանքային դաստիարակության նպատակը ոչ այնքան աշխատանքային գործունեության պատրաստի նմուշների ձևավորումն է, որքան աշխատանքի դրդապատճառների և ինքնուրույն աշխատելու ունակության զարգացումը: Աշխատանքային դաստիարակությունը կոչված է՝ նախապատրաստելու երեխային կյանքի դժվարությունները հաղթահարելուն, երեխայի սոցիալական հասունացմանը,

աշխատանքի արդյունքի հասարակական արժևորմանը, մինևույն ժամանակ այն նպաստում է անձնային որակների դաստիարակությանը: Ամփոփելով աշխատանքային դաստիարակության բաղադրիչների ձևավորման ընթացքը՝ համոզվում ենք, որ աշխատանքային գործունեության ձևավորման տրամաբանությունն ուղղված է աշխատելու ցանկության և կարողությունների զարգացմանը և աշխատանքի հանդեպ մտածված և պատասխանատու վերաբերմունքի ձևավորմանը: **Աշխատանքային գործունեության զարգացումը աշխատանքային դաստիարակության կարևորագույն խնդիրներից մեկն է:**

ԳԼՈՒԽ 2

ՆԱԽԱԴՊՐՈՑԱԿԱՆԻ ԱՇԽԱՏԱՆՔԱՅԻՆ ԴԱՍՏԻԱՐԱԿՈՒԹՅԱՆ ԳՈՐԾԸՆԹԱՑԻ ԿԱԶՄԱԿԵՐՊՄԱՆ ԽՆԴԻՐՆԵՐԸ

Աշխատանքային դաստիարակությունը մանկավարժական գործընթաց է՝ ուղղված աշխատանքի հանդեպ գիտակցված վերաբերմունքի, աշխատանքի արդյունքը գնահատելու կարողության, աշխատելու պահանջմունքի և աշխատասիրության ձևավորմանը: Նախադպրոցականի աշխատանքային դաստիարակության գործընթացն ուղղված է երեխայի անձային հատկությունների ձևավորմանը՝ նրա կողմից ծավալող աշխատանքային գործունեության ընթացքում: Աշխատանքային դաստիարակության նշված սահմանումից, նպատակից և տրամաբանությունից երևում է, որ այս ուղղությամբ տարվող մանկավարժական աշխատանքը բաժանվում է, կարծես, երկու մասի և առանձնացվում է աշխատանքային դաստիարակության խնդիրների երկու խումբ: Առաջին խմբի խնդիրներն ուղղված են աշխատանքային գործունեության բաղադրամասերի ձևավորմանը, որի արդյունքում ձեռք է բերվում գիտակից վերաբերմունք աշխատանքի և աշխատանքի արդյունքի նկատմամբ, ձևավորվում է աշխատելու ցանկություն: Երկրորդ խմբի խնդիրները կոչված են լուծելու անձնային զարգացման հիմնահարցեր և ուղղված են աշխատանքի ընթացքում անձնային որակների դաստիարակությանը:

Առաջին խմբին դասվող խնդիրներն են.

- Աշխատանքի հանդեպ հարգանքի և գիտակից վերաբերմունքի ձևավորումը:
- Աշխատանքային գործունեության կառուցվածքային տարրերի ձևավորմանը:
- Աշխատանքային կարողությունների և հմտությունների ձևավորումը:
- Աշխատելու պահանջմունքի զարգացումը:

Երկրորդ խմբին են պատկանում հետևյալ խնդիրները.

- Բարոյականային հատկությունների ձևավորումը:
- Աշխատասիրության դաստիարակությունը:
- Սոցիալական հատկությունների և հմտությունների ձևավորումը:
- Աշխատանքային գործնական փոխհարաբերությունների ձևավորումը:

Աշխատանքային դաստիարակության խնդիրները նախադպրոցական տարիքում իրականացվում են երեխաների աշխատանքի ձևավորման կազմակերպման և ղեկավարման միջոցով:

Պարապմունքի պլան

Առարկան՝ Կերպարվեստ

Տեսակը՝ Դեկորատիվ

Խումբը՝ ավագ

Թեման՝ «Նախազարդ սրբիչներ»

Նպատակը՝ երեխաներին ծանոթացնել հայկական զարդանախշերի հետ թղթե նախազարդ սրբիչների միջոցով, զարգացնել երեխաների գունազգացողությունը, երևակայությունը, նպաստել գեղագիտական և աշխատանքային դաստիարակության զարգացմանը: Հետաքրքրություն առաջացնել զարդանախշեր նկարելու հանդեպ: Աշխատանքային դաստիարակության նպատակով օգնել երեխաներին գործադրելու լուրջ ջանքեր, ցուցաբերելու համբերատարություն աշխատանքի արդյունքին հասնելու համար: Դաստիարակել կոկիկ և խնամքով աշխատելու ձգտում:

Անհրաժեշտ պարագաներ՝ հայկական զարդանախշեր կրող գորգերի, առարկաների նկարներ, վերատպություններ, նախազարդ սրբիչներ, սպիտակ թղթեր, վրձիններ, ջրաներկեր:

Պարապմունքի ընթացքը

-Երեխանե՛ր, առհասարակ, ամեն ժողովուրդ էլ ստեղծել է իր զարդանախշերը՝ հիմնվելով ավանդույթների, սովորույթների, դիցաբանության վրա և հիմա դրանք վերհիշելու ամենատարածված ձևերն են հագուստը, զարդերը և աքսեսուարները: Եվ մենք հայերս ևս ուենք մեր զարդանախշերը, որոնց նրբագեղությունը, նրբաճաշակությունը, բազմազանությունը միշտ էլ հետաքրքրել է հայկական արվեստը հետազոտողներին: Մենք այսօր մեր պարապմունքին նկարելու ենք թղթե նախազարդ սրբիչներ՝ կիրառելով բուսական և երկրաչափական զարդանախշեր: Հայկական զարդանախշերը օգտագործվել են գորգագործության,

ճարտարապետության, ոսկերչության, խեցեգործության, ասեղնագործության և այլ բնագավառներում:

Այժմ մենք միասին վրձնի օգնությամբ կնկարենք գեղեցիկ սրբիչներ՝ հայկական զարդանախշերով: Այդ ընթացքում երեխաներին ցույց տալով զարդանախշերի նկարներ՝ անհատական մոտեցմամբ երեխաներին սովորեցնում եմ պատկերել նախշեր թղթի վրա: Երեխաներին սովորեցնում եմ նկարել բնօրինակից, ինչպես նաև պատկերացմամբ՝ ծաղիկներ, մրգեր, երկրաչափական պատկերներ: Արտահայտչականորեն ցույց տալ հարաբերական մեծությունը, առարկայի դիրքը: Հիմնվելով գույների իմացության վրա (կարմիր, կապույտ, դեղին, կանաչ դրանց երանգները)՝ կարողանալ ընտրել գունային գամմա՝ պատկերը հաղորդելու համար: Վրձինը լավ հագեցնել ներկով: Սկզբնական շրջանում երեխաները աշխատեցին բաց գույներով: Միջառարկայական կապ ենք ստեղծել ֆիզկուլտուրայի հետ, որպեսզի ներկայացնենք սրբիչի կիրառման նշանակությունն ու կարևորությունը:

Ֆիզկուլտ դադար

Լվանում ենք ձեռքերը(ձեռքերը հպում են իրար):

Վառվռուն մեր աչիկները(ցուցամատը զգույշ հպում են աչքերին):

Փոքրիկ քիթիկն ու բերանը(ցույց են տալիս քիթն ու բերանը):

Վլոր պայծառ մեր դեմքը(շրջանաձև մատը սահեցնում են դեմքի շուրջ բոլորը):

Ֆիզկուլտ դադարից հետո երեխաների գունազգացողությունը զարգացնելու նպատակով կազմակերպել եմ «խաղ գույներով», որի ժամանակ երեխաները, լսելով իմ հրահանգը, արագ թղթի վրա գծում են այն գույնը, որը լսում են ինձանից: Նշենք, որ պետք է ուշադրություն դարձնել դժվարացող երեխաներին, և հաջորդ օրը նրանց հետ կարելի է նրանց հետ կրկնել առաջադրանքը:

Պարապմունքին ներկա էին տնօրենը, մանկավարժ-մեթոդիստը, ովքեր բարձր գնահատեցին պարապմունքի անցկացման որակը և դիդակտիկ կարևոր նշանակությունը:

Ամփոփում՝ Ինչ ստացան երեխաները տվյալ պարապմունքից, ամփոփել եմ **ԳՈՒՍ** մեթոդով:

<p>Գիտեմ, որ հայկական զարդանախշերը եղել են նաև հնում: Դրանք մեզ են փոխանցվել արվեստագետների աշխատանքների միջոցով: Զարդանախշերը լինում են գորգերի, կահուքի, հայկական տարազների, զարդերի վրա:</p>	<p>Ուզում եմ իմանալ այն, թե ինչպես կարող ենք բնական նյութերով պատրաստել զարդանախշեր, բնական կոմպոզիցիաներ:</p>	<p>Մովորեցինք նկարել նախշազարդ սրբիչներ՝ մրգային և ծաղկային զարդանախշերով: Մովորեցինք նաև, որ հայկական զարդանախշերը օգտագործվել են քանդակագործության, ճարտարապետության, խեցեգործության, ասեղնագործության մեջ: Մովորեցինք պլանավորել աշխատանքը, աշխատել, կոկիկ և խնամքով:</p>
--	---	--

ԵԶՐԱԿԱՑՈՒԹՅՈՒՆ

ԳԻՏԵՄ	ՈՒԶՈՒՄ ԵՄ ԻՄԱՆԱԼ	ՍՈՎՈՐԵՑԻ
-------	------------------	----------

Այսպիսով,

1. Աշխատանքային դաստիարակությունը՝ որպես նախադպրոցականի առաջատար գործունեություն, երեխայի զարգացման ու դաստիարակության լավագույն միջոցն է:
2. Աշխատանքի դերն ու նշանակությունը նախադպրոցականի կյանքում դիտվում են որպես երեխայի համակողմանի զարգացման, ինքնահաստատման կարևորագույն միջոց:
3. Ինչպես ցույց տվեց ինտեգրված պարապմունքի անցկացումը, կերպարվեստի դասի ընթացքում երեխան հաջողության զգացում է ունենում, երբ ներքաշվում է առաջադրանքի կամ իր իսկ սահմանած առաջադրանքի մեջ, ինչպես օրինակ՝ ընկերոջ հետ միասին ճանապարհի հարթել արգելքների միջով: Նման գործողությունները չպետք է սահմանափակվեն դաստիարակների, մեծահասակների կողմից՝ ճիշտ կամ սխալ, լավ կամ վատ գնահատականներով:
4. Երեխաները սովորում են՝
 - զարգացնել խնդիրներ լուծելու իրենց հմտությունները,
 - սոցիալական հմտություններ (հաղորդակցում, բանակցում, խնդիրների լուծում)
 - հմտություններ զարգացման բոլոր ոլորտներում (իմացական, լեզվական, սոցիալ-հուզական, ֆիզիկական),
 - հաճույք զգալ, ուրախանալ:

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Ս. Ա. Մարության, Ա.Ս. Դավաթյան, Նախադպրոցական մանկավարժություն, բուհական դասագիրք: Եր.<<Գասպրինտ>>, 2008, 288էջ:
2. Նախադպրոցական մանկավարժություն, Է. Ս. Ալեքսանդրյանի խմբագրությամբ, Երևան 1992:
3. Մարգարյան Լ., Խոսքի զարգացման պարապմունքները մանկապարտեզի կրտսեր 2-րդ խմբում, Եր.,<<Զանգակ>> հրատարակչություն:
4. Մախչանյան Հ., Համագործակցության մանկավարժություն, Երևան, 1986:
5. Козлова С.А. Куликова Т. А. Дошкольная педагогика-Москва. 2000: